

- 1 rbbi a-igan tifawt-inu ula anjjam-inu.
ma-zġ-rad-iksadġ?
rbbi a-igan lbrj-inu iħdu tudrt-inu.
ma-ra-yyi-issiwġ?
- 2 waħħa-d-uškan gar mddn a-yyi-hlkn,
rad-εtrn ħrn inuwwašn-an.
- 3 d-waħħa-yyi-sutln ayt-imiġ ggutnin,
ur-ra-yiksad-uwl-inu.
waħħa-d-kullu-ġlin s-uwzzal d-imqlad,
rbbi a-s-a-tzεamġ.
- 4 ħalbg zġ-rbbi ġir yat-tġawsa.
ġir nttat ad-riġ.
ħalbg-as ad-zdġġ ġ-tgmmi-ns tamzlayt
kullu ma-rad-sulġ,
lhuġ s-ma-t-irdan ġ-illig illa nttan,
issanġ tamimt-ns.
- 5 ra-yyi-iħdu rbbi ġ-ddu-tduli-ns
ġ-uzmz n-tnukmut.
rad-bdda-yyi-issntal ġ-untal-ns izgan,
ig-iyi-n f-ujarif yattuyn l-laman,
- 6 yall iħf-inu f-willi-yyi-sutlnin.
rad-tmjjadġ rbbi s-lfrħ iggutn,
ssakmurġ-as-n tiwafkiw ġ-untal-ns amzlay,
asiġ amarg ayrirġ i-rbbi.

- 7 sfld-iyi a-rbbi, hati ġriġ-ak-n.
ħnnu flla tεawnt-iyi.
- 8 tnnit-iyi a-rbbi «akmur-d tissant-iyi.»
hati kiya a-s-riġ a-n-akmurġ a-rbbi.
- 9 a-ur-twrrit taggugt-n zġ-gigi.
hati kiya a-igan lεawan-inu.
a-ur-iyi-tag^wit tbzgt flla tflti-iyi.
hati kiya a-igan anjjam-inu.
- 10 iġ-iyi-akk^w-ifl baba ula immi,
hati kiya a-rbbi ra-yyi-bdda-tirit.
- 11 ml-iyi a-rbbi ma-gigi-tqšadt,
tguwwdt-iyi bdda ġ-uġaras yastwan,
ar-iyi-tssinift i-willi-yyi-tkrhunin.
- 12 a-ur-iyi-tflti ġ-ufus n-inuwwašn
lli-flla-sskirkisnin ar-gigi-rggmn.
- 13 umnġ is-rad-zrġ ġ-tudrt n-ddunit-ad
lbaraka n-rbbi.
- 14 amz ġilad ġ-rbbi, tssdust ul-nnk,
tkklt bdda f-rbbi.